

OCT 11 2022

ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

HENSEY H. SORIMLE, BERTINE)
LAKJOHN, and EMTY SORIMLE,)

plaintiffs,)

vs.)

LIWOJ JERBAL,)

defendant.)

CIVIL ACTION NO. 2016-143

UAAK NON KAKOBABA IN KAJITOK

RO UAAN PANEL EO:

Grace L. Leban
Presiding Judge, TRC

Nixon David
Associate Judge, TRC

Claire T. Loeak
Associate Judge, TRC

MELELE KO IKIJEN UAK NON KAKOBABA IN KAJITOK:

Case in ear roltok non TRC Panel eo non etale im uake kakobaba in kajitok ko litok jen High Court eo. High Court eo ear lo bwe uak eo an ro elon uae ilo TRC Panel eo ear jab loor Rule 201(b) im 201(e) ilo Rules of Evidence (ROE). 28 MIRC Chp 1.. Ekkar non High Court eo, jemlok eo jen ro elon uae ilo TRC Panel eo, ear jab loore Rule 201(b), ilo an kar jab bwe melele ko rar kwalok ikijen aer ba bwe (i) Lobeia, enwot Laelan im Jeimata, ear mour ilo 1900 ko im jab ilo 1800 ko, im (ii) bwe wawen in ejelok kajitok kake. Naan in kamool ko an rikamol eo an Riabnono ro, Philomena Muller, ej kalikar bwe lellap eo jinen, Neirele, ear lotak ilo 1911 eo, im bwe Lobeia ej jimaan Neirele, kin menin Panel eo ej kile melele in bwe Lobeia ear mour ilo 1800 ko im bareinwot ilo 1900 ko. High Court eo ej bar loe bwe ro elon uan ilo Panel eo, ear

likjab im jab loor Rule 201 (e), ilo an kar jab lelok ien non Riabnono ro bwe ren kajitikin an Panel eo ‘take judicial notiec’ mokta jen aer kadriwojlok jemlok eo aer.

Kin menin, Panel in kio, eo im ekoba tok Associate Judge Claire T. Loeak, eo ej bok jikin late Judge Walter Elbon ilo court in an Mani, ear bar kur non juon ien ronjake ilo April 5, 2022, non an Riabnono rein kwalok melele ko aer ikijen an ro elon uer ilo TRC Panel eo kar bok *judicial notice*. Court in ear bareinwot kadrelon tok kein kamol, Plaintiff Exhibit P-10, einwot juon bwebwenato in etto eo an bamle im ejejot bwe en dreton ekkar non Rule of Evidence 804(b)(4). Iben tok ear bar dreton tok kein kamol an Riabnono Plaintiffs’ Exhibit P-15, pija in uleej eo an late Jeimata Kabua , Plaintiffs’ Exhibit P-16, eo ej melele ko jen jeje ko an Jack E. Tobin, im Plaintiff Exhibit P-18, eo ej naan in kamol ko an Namdrik Labi ikijen kein kamol Plaintiff Exhibit P-10. Ijelokin kein kamol ko im court in ear kadreloni, ear bar kadrelon tok kein kamol eo an Rijumae Abnono eo, kein kamol Defendant Exhibit D-2, eo ej juon menmenbwij eo im ekobaiktok lajrak eo an Iroj in Ratak-Ean ro. Riabnono rein rar kwalok aer jab erra ilo an Panel in kadrelone kein kamol in an Rijumae Abnono eo, Defendant’s Exhibit D-2, botab iumin Rule in ekajet ko an court in an Mani, TRC Rules of Civil Procedures 15, ear wonmanlok wot im kadrelone kein kamol in.

UAAK NON KAKOBABA IN KAJITOK:

Kajitok eo enwot an walok ilo Order eo an High Court eo im ear file ilo February 22, 2022, ikijen kakobaba in kajitok non Traditional Rights Court eo ej einwot in:

Ikotaan Hensey Sorimle im Liwoj Jerbal, won eo ekkar im jimwe bwe en kabjor maron eo an Irojlaplap im Irojedrik ion Biken Island, Aur Atoll im Airok Island, Maloelap Atoll, Republic eo an Marshall Islands?

UAAK:

- **Liwoj Jerbal ej kabjor maron eo an Irojlaplap ion Biken Island, Aur Atoll im Airok Island, Maloelap Atoll.**
- **Enwot juon eo ej kabjor maron eo an Irojlaplap ion Biken Island, Aur Atoll im Airok Island, Maloelap Atoll rainin, eber maron eo iben Liwoj Jerbal non lelok maron eo an Iroj-edrik non nejin maan ro ilo bwij eo, ak ro rej lajrak ilo botoktok,**

ak ro ewor botoktok in Irojibbeor, im ekkar non lajtrak ko ilo bwij eo. CA 2006-101, Latdrik v. Jane's Corp., CA2017-026, Clanry v. Zedkaia, (Kabua, p. 2).

Alkln an kar Panel in an Traditional Rights Court (TRC) bar etale uak eo an, ear wonmanlok wot im kabin kolmenlokjen im uak eo an bwe Liwoj Jerbal ej e eo ejimwe im ekkar bwe en kabjor maron eo an Irojilaplap im Irojiedrik ion Biken, Aur Atoll im Airok, Maloelap Atoll.

UN EO IM ETKE:

Panel in ej loe ilo kein kamol eo an Riabnono, Plaintiffs' Exhibit P-7, menmenbwij eo an Iroj in Ralik, bwe Lobeia im Jeimata rej jimor jiljino(6) ebeben laltak jen Litarao ilo lajtrak ko aero jen dron. Im melele in rikamol Philomena Muller ear bar erra kake ilo naan in kamol ko an. Panel in ej bareinwot loe bwe ekkar non kein kamol P-6, kwon eo ikotaan Germany im Iroj in Majol ro ilo 1885 eo, Lobeia im Kabua Lap eo jemen Jeimata, erro kar jimor sign i kwon in. Im ekkar non kein kamol P-15, pija in ulej eo an Jeimata, ej walok ke Jeimata ear lotak ilo 1850, melelein ej jilunoul-lalem (35) an iio tore eo jemen, Kabua Lab ear sign i kwon eo an Germany. Wawen in ej kalikar bwe Lobeia emaron kar ak emaron kar jab jen ebeben eo an Jeimata im Laelan. Ejelok kein kamol eo ej lukun kalikar menin, ijelokin wot ad melele jen kein kamol kein ke Lobeia ear mour ilo jet torre kotoan 1800 im 1900 ko.

Panel in ej loe bwe elon melele ko rejab jejjot ilo kein kamol P-10 ilo ad keidi iben melele ko jet rej walok ilo kein kamol ko jet an Riabnono rein. Einwot ke, ekkar non melele kein ilo kein kamol P-10, ej ba bwe Lobeia ear anjo jen Jortoka ilo tarinae, innem Jortoka ilo an kar jab anjo, ear lelok wot Airok, Maloelap im Biken, Aur. Panel in ej melele bwe ilo mantin tarinae ko etto an Iroj ro, elane juon Iroj ej anjo ilo tarinae, innem aoleb ijoko jikin Iroj eo ejab anjo, renaj etal non eo ej bok anjo. Ak jej loe ilo bwebwenato in ke ruo (2) wot jikin ilo aoleb ijoko jikin Jortoka ilo Ratak-Ean ear etal non anjo eo an Lobeia im lomaro jatun. Kein kamol P-10 ejbar ba bwe Mamjilan im kora eo jatun, Wanlur, rej Leroij, im ilo naan in iakwelel kein an Riabnono rein rej ba bwe lellap rein rej Leroij in kabinmeto ilo Ralik, im bwe Mamjilan im Lakiat rej jinen im jemen Lobeia. Panel eo ear lale menmenbwij eo an Iroj in Ralik, kein kamol P-7, im lo bwe ejelok etan Mamjilan ak Wanlur ilo menmenbwij in an Iroj in Ralik. Panel in ej bareinwot loe bwe ewor wot etan Lakiat, eo jemen Lobeia im iben Mamjilan. Kin menin, Panel in ej loe bwe

ewor idrabortok ko ilo melele kein ilo kein kamol P-10 ibben kein kamol ko jet an Riabnono rein, einwot ke kein kamol P-10 ej ba Mamjilan ej Leroij in kabinmeto ilo Ralik ak ejako etan ilo Menmenbwij eo an Iroj in Ralik, ak ewalok wot etan leo ibben, Lakiat. Ejja ilo wawen in wot, kein kamol P-10 ej bar kwalok bwe etan jinen Lailik in Wanlur, eo edriklak jen Mamjilan, im ej bareinwot juon Leroj. Panel in ej bareinwot loe an idrabortok melele in iben kein kamol P-7, enwot ke ilo menmenbwij in an Iroj in Ralik, ejelok bar etan Wanlur ilo lajtrak kein an Iroj in Ralik. Kein kamol P-7 ej kwakok ke Lobeia ej nejin Lakiat ilo menmenbwij eo an Iroj in Ralik, im bareinwot ilo menmenbwij eo an Iroj in Ratak, Defendant's Exhibit D-2. Ilo wawen in Panel in ej loe juon tua ak kotoan eo ilo melele ko ilo P-10 im P-7, im naan in kamol ko an rikamol ro bwe rejab rejetake dron.

Ikijen kein kamol P-16, melele ko jen jeje ko an Tobin, Panel eo ear etale melele kein an Tobin, im loe bwe ej walok torrein jijot eo an Irojlaplap Murjil ke ear kabjor maron in Irojlaplap jen 1916 eo mae 1919 eo. Panel in ej bar loe bwe ejab walok torein jijot eo an Tonuia im ejab walok ke e eo ej Irojlaplap in Airok ilo tore eo, ak ej kwalok wot ke ej juon Iroj in Airok, Maloelap. Panel eo ej loe jen melele kein bwe ejimwe an Tobin ba bwe Tonuia ej juon Iroj in Airok, Maloelap tore eo, einwot ke ekkar non menmenbwij eo an Iroj in Ratak-ean ak kein kamol D-2, Tonuia ej bar ber ilo lajtrak in jolet maron eo an Irojlaplap ilo Airok, Maloelap. Ijo wot ke, ilo tore in Tobin ej kenono kake, Tonuia ejab juon Irojlaplap, ak ej watoke juon Iroj, einwot ke ekkar non manit, juon eo ej kabjor maron im jijot kin maron eo, jej naetan laplap ak Irojlaplap.


Panel eo ej bin wot ilo lemnak eo an ikijen an kar Murjil im Lobeia kar sign ilo kwon eo an Iroj ro iben kien eo an Germany, bwe mekarta, Lobeia ear sign ak ejab melelein bwe e eo ej kabjor maron an Irojlaplap in Airok im Biken tore eo. Ilo an kar Panel eo etale Iroj ro jet im rar bareinwot sign non ailin ko jet, elon wot ian ailin ko ilo Majol, ro rar sign ikijen Irojlaplap ro rejab kabjor maron tore eo. Non wanjonak, ilo Majuro, ear jab sign wot Kaiboke non mona eo an, ak ear bar sign Rime im Leit, ro im rar jolet alkin Kaiboke. Ilo ailin in Mili Langinat wot ear sign ak ear jab sign aoleb ro rej kabjor maron non mona ko jet lo tore eo. Ilo ailin in Ebon, ewor wot ruo (2) mojen ko ie, ak elonlok jen ruo (2) Iroj rar sign ilo kwon eo. Wawen in ej kabin lok tomak eo an Panel in bwe mekarta Lobeia ear sign, ejab melelein bwe e eo ej kabjor maron eo an

Irojlaplap ion Airok im Biken ilo tore eo. Einwot ilo ailin ko jet, Lobeia emaron kar sign ilo etan eo ej jijot lo tore eo.


Panel eo ej kile bwebwenato in ikijen an Lobeia im lomaro jatun kar itok jen Ralik im tarinae iben Jortoka im Murjil ilo Ratak im bok anjo. Mekarta ej juon bwebwenato eo jen ro lak mokta, ak Panel in ej loe bwe ejab bwe kein kamol ko rej kalikar bwe Lobeia ear kabjor maron in Irojlaplap ion Biken im Airok jen an kar anjo ilo tarinae eo nae Jortoka im Murjil.

Panel eo ej loe kein kamol ko rej kalikar ke Liwoj Jerbal im ro lak mokta ilo bwij eo an rar kabjor maron in Irojlaplap ion Biken, Aur im Airok, Maloelap. Kwelok eo an Iroj in Majol ro im ear koman ilo Jaluit ilo 1921 eo, ej walok ilo pija in ke Tojeie eo ear kwelok`einwot juon Iroj jen Maloelap ekkar non kein kamol an Rijjumaee Abnono Defendant's Exhibit Y. Panel eo ej bar loe ilo *Civil Action 444, Lebeiu v. Motlok*, ej walok bwe Namdrik, eo im ear jako ilo 1948, ear kabjor maron an Irojlaplap ilo Airok, Maloelap im tok alik Anru ear bok jikin. Ilo an jab alikar juon un eo elab, ijelokin bwebwenato in ej walok ilo kein kamol P-10, Panel in ej rie melele eo ej walok ilo *CA 151, Likinono v. Nako*, ilo an ba bwe ekkar non manit, jimwe im maron ko karoki jen Irojlaplap ro lak mokta rejab aikuj oktak ijelokin wot ne ewor un ko rekajur im lap non ukoti. Iumin ruatimjonoul-jiljino (96) iio in an bwij in an ro lak iman non kio eber iben Liwoj Jerbal, kabjor maron eo an Irojlaplap ion Airok, Maloelap im Biken, Aur. Ilo an jabwe melele ko non rie kein kamol P-10, im berber ion aoleb melele kein limantak jen party kein jimor ilo case in, Panel in ej tomak bwe Liwoj Jerbal ej e eo ejimwe im ekkar bwe en kabjor maron an Irojlaplap ilo Biken Island, Aur Atoll im Airok Island, Maloelap Atoll.

Raan: 10/11/22



Grace L. Leban
Presiding Judge, TRC



Nixon David
Associate Judge, TRC



Claire T. Loeak
Associate Judge, TRC